



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Septem Illustrium Virorum Poemata**

**Amstelodami, 1672**

Psyche, seu fabula Papilionis.

**urn:nbn:de:hbz:466:1-11215**

## PSYCHE, seu fabula Papilionis.

**N**ympharum PSYCHE quâ non fuit altera totâ  
 Pulcrior Arcadiâ, cui cura nec ulla fluentem  
 Aut mulcere comam, aut tenues percurrere telas.  
 Miles erat Phœbes, voluitque inculta videri,  
 Et placuit. nemora & silvas nec gratior ulla  
 Attigit, aut montes venatu terruit ulla.  
 Jamque toros tædis ætas matura jugales  
 Spondebat: fugit illa faces & nomen amantis,  
 Seque odit, votoque dolet quòd forma repugnet:  
 Cùm fatus Iapeto, quem PSYCHES mater eodem  
 Ediderat Clymene fortunatissima partu,  
 Attulit inventum cælo mortalibus ignem,  
 Nec benè digestam, & certâ sine imagine massam,  
 In speciem eduxit moderantùm cuncta Deorum.  
 Ille (fide majus!) lapidem vix admovet igni,  
 Paulatim letalis hiems de marmore cedit.  
 Vincula mollescunt genuum, saxumque relinquit,  
 Vitalesque vias & respiramina liber  
 Spiritus intus obit: vocis recluditur usus:  
 Conatus loquitur. nil trunci restat in illo.  
 Miratur, tacitumque rogat PSYCHE inscia fratrem:  
 Unde vigor lapidi? quæ tanta potentia flammæ?  
 Frater ad hæc contrâ: Donum immortale Minervæ  
 Aspicias: ast alios Cypris tibi destinat ignes.  
 Jam distingue comas, & finge decentiùs ora.  
 Indoluit virgo, vetitamque agnoscere flammam  
 Attentat propiùs: sed enim, ceu concitus Austro  
 Per stipulas flavasque furit Vulcanus aristas,  
 Atque alimenta suo præbet seges arida damno:



Sic inconcessos ubi virgo contigit ignes,  
 In flammam abit, ac veluti è fornace profundâ  
 Ferventes trahit ore faces, & concipit æstus.  
 Vix fratri cineres, & cognoscenda supersunt  
 Ipsius effigies, & quæ ferat ossa sepulcro.  
 Ille sed exanimis properat, semiustaque membra  
 Componit tumulo, fumantiaque exta fororis  
 Ambrosiæ succis, & odoro gramine condit.  
 At flamma haud oblita sui est, servatque vigorem  
 Ingeniumque suum, tumuloque erumpit, iterque  
 Dat volucris, variis quæ picta coloribus alas,  
 Nunc etiam vetitos demens circumvolat ignes,  
 Atque suas PSYCHE flammam, sua damna, frequentat.

